



Heidelberger Texte zur Mathematikgeschichte

Autor: **Plücker, Julius (1801–1868)**

Titel: **Enumeratio novorum phaenomenorum
recentissime a se in doctrina de magne-
tismo inventorum**

Bonn, Programm zur Gedenkfeier für Friedrich Wilhelm III. am 3. August 1849. 28 S., 1 Taf.
Signatur UB Heidelberg: 38.480

SACRAM MEMORIAM
REGIS SERENISSIMI
DIVI
FRIDERICI GUILELMI III
AUGUSTISSIMI HUIUS UNIVERSITATIS CONDITORIS
NATALI EIUS DIE III. MENSIS AUGUSTI
HORA XI.
AB LITTERARUM UNIVERSITATE FRIDERICIA
GUILEMIA RHENANA

PIE CELEBRANDAM

INDICIT

IULIUS PLÜCKER

ORDINIS PHILOSOPHORUM H. A. DECANUS

PRÆMISSA ENUMERATIONE NOVORUM PHÆNOMENORUM RECENTISSIME
A SE IN DOCTRINA DE MAGNETISMO INVENTORUM.

ACCREDIT TABULA LITHOGRAPHICA.

BONNAE A. CICLOCCCXXXIX.

LITTERIS GEORGIANIS.

38,480

Coortis vixdum magnis illis animorum motibus, qui cultioris Europae partem longe amplissimam graviter concusserunt, euidem quaestionum earum seriem confeceram, quibus mathematicae disciplinae locum illustrem, ad stipulantibus, ut spero, harum rerum peritis, nova prorsus specie novaque luce exornasse mihi videor. Ac sane mirifice etiamtum his studiis deditus eram, nec quominus incepsum laborem decurrerem, ullo pacto deterrerebar, licet multa eaque sat gravia obstarent impedimenta, quae nihil attinet hoc loco commemorare. Quin etiam contemendas putabam suspiciones quasdam et calumnias, quibus in altero professionis meae publicae munere obnoxius eram. Sed ut primum eo, quo intenderam, perveni, nihil antiquius habui, quam ut estimationem meam a malignitate defendarem. Iamque naturae arcana nonnulla, paullo quam contigisset ante, felicius indagaveram, cum temporum ratio optimum quemque impellere videbatur, ut reipublicae communique saluti iuvandae operam navaret. Aliquamdiu incertus eram, quid agerem; sed cum eos ipsos viros, quorum summa apud me esset auctoritas, altiora velle, quantum quidem efficere possent, intelligerem, animoque praeviderem mala, sola experientia sananda, otiosus spectator quam particeps rerum esse malui. Quod consilium si forte excusatione egere videatur, dabunt eam, opinor, hae schedulae, in quibus quidquid novi ab eo inde tempore in physica experimentali inveni, quam brevissime potui, perscripsi.

I.

De modo quo corpora solida magnetismi vi afficiuntur.

Clarissimus Faraday notissima illa commentatione, qua magnetismi doctrinam tanto provexit, ut novam illinc aeram deduci summo iure dicere possis, demonstravit, magnetismum omnia corpora afficere et id quidem dupli ac contrario modo, ita ut duas in classes distribuantur, in magnetica, quibus eadem ac ferro ad magnetem est relatio, atque in diamagneticis, quae sicuti bismuthum, massam si spectas, non adtrahuntur sed repelluntur et quae inter polos suspensa non axialiter diriguntur, i. e., ut directio longitudinalis eadem sit ac lineae polos coniungentis, sed aequatorialiter, i. e. illi lineae perpendiculariter. Quibus in experimentis repetendis subtiliorem suspendendi modum adhibentes, pro navicula (papyracea e. gr.) scilicet solo bombycis filo utentes, non, ut creditum erat, omnes animalium et plantarum partes diamagneticas esse, reperimus. Ita, exemplum ut proferamus, lex nobis visa est universalis, cortices arborum aliarumque plantarum semper magnetice, partes contra internas omnes diamagnetice sese habere. Elytra porro coleopterorum v. gr. melolonthae vulgaris magnetica inveniuntur. Neque, quod fortasse conieceris, ullum est discrimen actionis, de qua agitur, inter ranae nervos et musculos. Mox autem talibus de disquisitionibus sane dignis, quibus physiologi studium admoveant, ad altera deducti sumus experimenta.

III.

De corporibus liquidis magneticis et diamagneticis.

Non solum corpora solida, verum etiam liquida magnetica aut diamagneticia esse, cl. Faraday hoc modo demonstravit, ut tubulum vitreum, parietibus tenui-

bus, illis impletum inter polos suspensum et oscillantem observaret. Aliud spectantes liquorum magnetismum novis experimentis perquisivimus. Haud ignorantibus nobis, magnetem omnes corporis magnetici particulas minimas adtrahere, diamagnetici contra moleculas repellere, eluceret, necesse erat, aequilibrium hydrostaticum fluidorum magnetis vi turbari et hanc ob causam superficiem liberaformam mutari. Planis igitur polarum magni validique, quo usi sumus, electromagnetis maiores armaturas (v. tab. fig. I.) ita imposuimus, uti canales terram spectarent et partes curvae altera alteri oppositae essent, indeque vitro horologii in illis collocato liquorem infudimus perquirendum. Pro vitro interdum foliolo micae fluido humectato uti melius videbatur. Quodsi adhibes liquorem magneticum, imprimitis solutionem maxime saturatam ferri muriatici pulcherrimum (admiraberis phænomenon; namque veluti scobes ferreae polis magnetis injectae illo loco praecipue aggregantur, quo maxima agit vis, ita et liquor. Quem eundem locum liquorem diamagneticum fugere, inde coniicies *). Fluidum, cuius aliquot guttas vitro infuderis, polis ad quaedam usque millimetra admotis, e superficie forma mutata illico aut magneticum aut diamagneticum cognosces, quam formam mutatam obiecto quodam satis remoto superficie reflecto facillime percipies. Hoc simplicissimo modo aqua, alcoholum, cetera diamagnetica reperiuntur, etiam hydrargyrum, dummodo vasi infuderis e metallo confecto et ante amalgamato, quo illo humectetur; item kali borussici rubri solutio magneticam, fulvi diamagneticam se praebet. Sanguinem ranae, bovis, humanam diamagneticam invenimus.

Primi adhibuimus libram, qua corporum pondera, magnetica attractione aucta aut diamagnetica repulsione diminuta, patefaceremus, quibus de experimentis quae deduxerimus paragrapho V. proferemus. Eodem instrumento utiliter ad determinandum magnetismum aut diamagnetismum auctum aut debilitatum corporis liquori alicui immersi. Quam viam sequuti leges protulimus, quae, si vis, nil nisi lex Archimedica longius extensa videntur, pro gravitate magnetismi vi substituta. En, quae sint.

Quodsi magnes alicuius corporis moleculas et cuiusdam fluidi illi circumdati, vel adtrahens vel repellens, sollicitat, magnetis effectus in corpus immersum idem est atque in corpus vacuo circumdata, effectu subtracto in liquorem qui illius implevit volumen.

*) Ann. Pogg. Völ. LXXIII. „Experimental-Untersuchungen über die Wirkung der Magnete auf gasförmige und tropfbare Flüssigkeiten.“ 21. Febr. 1848.

Aequo modo res se habet, si non effectum integrum respicias (qui in universum adtribui potest vi unicae atque virium pari, „couple“) sed qui est in aliquam directionem (correspondet vi modo relatae datam in directionem projectae). Quibus e legibus clarissime elucet, cur araeometrum, cuius globus parum tantum magnetice afficitur, magnetismo excitato, supra polis in liquore magneticō ascendat, in diamagneticō fundū petat, infra polos contrario modo se habeat, cur inter polos in liquido magneticō ad propiorem accedat, in diamagneticō medium versus tendat; patet, qua de causa solidum magneticum in liquore magis magneticō diamagnetice sese habeat, alteram vero in partem diamagneticum in liquore magis diamagneticō magnetice; optime intelligimus, qua ratione cylindrus e bismutho fabricatus, imo etiam e vitro non ita magneticō confectus, in saturata solutione sulfatis ferrici contra resistantiam, quam medium ei opponit, inter polos suspensus, tanta vi dirigatur; concludimus denique, leges, nuper modo ab Edmundo Becquerel, pronuntiatas, quae spatium vacuum bismuthum a polis depellere iubent, esse falsas *).

Ad perquirendam attractionem et repulsionem corporum pusillorum primi microscopio usi sumus, legem supra expositam nunquam non respicientes. Maxime commodum nobis visum est, armaturis foliolum micae impnere, cui liquidum examinandum infunderetur; speculum infra illud collocatum lucem necessariam sursum immittebat. Tali modo et sanguinem ranae et lac, totam si spectas massam, polos fugere observavimus, insuper autem in utroque globulos respective crux et adipis suo et proprio motu de punctis, quibus maxima exhibebatur vis magneticā, repellī animadvertisimus, unde globulos illos magis magneticos esse, sequitur.

III.

De magnetis agendi modo in corpora aëriformia.

Primum cl. Faraday corpora aëriformia magnete non sollicitari censuit, et quae paragrapho praecedente memoravimus docent, magnetis vim eam, quam in gazum loco motum exerceat, non tantum in corpus solidum valere, quam si pro

*) Comptes rendus; séance du 21. mai 1849.

„Ueber den Einfluss der Umgebung eines Körpers auf die Anziehung oder Abstossung, die er durch einen Magneten erfährt.“ Comm. fascicul. prox. Ann. Pogg. edenda.

corpore aëris formi liquidum substitueris, imo vim tam exiguum et debilem fore, ut ne via quidem loco citato exposita observari possit. Quum modo a cl. Faraday excogitata experimenta repetenda adtigissemus, ferrum flammæ, cuius ellychnium solutione ferrica oblitum erat, magnetis ope ostendere conati, flamمام potius repulsam esse notavimus, neque tamen hac de re quidquam fecimus, quippe qui quae exspectaveramus non videremus.

Hucusque ventum erat, quum Bancalari et Zantedeschi candelæ flammam electromagnetis polos fugere observarent; quid veri igitur similius, quam quod huius phænomeni causa effectū adscriberetur magnete in flammæ gaza exercito? Qua ratione commotus cl. Faraday experimenta antea derelicta denuo recepit; quod quidem ignorantes nosmet ipsi experimenta composuimus, e quibus quae sequerentur in Ann. Pogg. vol. LXXIII. publicavimus. Ostendimus, repellere vapores iodi, chlori, bromi, acidi nitrosi, hydrargyri, aquae, nec non aërem rheophoro calefactum et sole illustratum et umbram in papyrus proiicientem; animadvertisimus inde, polos fugere flamas candelarum e sebo, cera, stearino confectarum, spiritus yini et libere et cum ellychnio combusti, sulfuris, phosphoris, hydrogenii. Imprimis autem memoria dignum videtur phænomenon, quo flamma olei terebinthini aut candelæ sebatae valde fumantis inter polos, V ad X elementrum galvanicorum ope magnetica vi imbutos collocatae oculos delectat. Quod quidem optime nobis evasit armaturis in tabula adiecta littera (H) designatis utentibus et ita dispositis, ut acumina (b) ad aliquot milimetra usque alterum alteri adpropinquata essent utque eorum partes delimitatae flammæ basin spectarent. Ne aër fluctuans flammam turbaret mensae imposita erat libra Coulombii, eius pars superior, columnam ferens, demta erat, ne fumus provolutus flammam alimento privaret. Qui idem fumus haud secus ac flamma ipsa repellitur et in altum ascendens lineas format parabolicas, distincte limitatas, flammæ acclinatas.

Cl. Faraday huncce perquirendi modum sécutus est, ut gazis aëre levioribus de parte inferiori polarum inter hosce ipsos ascendentibus vasa superne locis diversis disposita offerret, et quae vasa impletae essent chemica arte videbret; quae gaza vero aëre graviora essent, super polos veluti liquorem effundebret infraque reciperet. Attamen quamvis ingeniose excogitata esset haec agendi ratio, nihil certi de magnetismi natura præbuit eam ob causam quod gaza perquisita non libera sed sua parte iterum gazis essent circumdata. Hoc tantum discrevit, num aliquod gazum plus an minus esset diamagneticum altero, aut, quod dirimi nequibat, plus minus magneticum. Quod in planum propellere vide

quō modo suscepimus. Si minimae corporis aërifōrmis particulae viribus ab aliquo puncto exeuntibus repelluntur, necesse prorsus est, ut, quum illi tanta sit elasticitas (*Compressibilität und Expansibilität*), non solum pondere, verum etiam densitate circum punctum memoratum mutetur. Unde concludimus fore, ut thermometrum aëre impletum et guttula clausum inter polos positum, magnetismo excitato, eodem modo se haberet, quasi aér inclusus caloris vi extenderetur. Experimentum, hoc modo compositum et institutum, expectationem non fefellit. Polis collocavimus armaturas maiores partibus curvatis adversis, V tantum millimetris admotis, interque ipsas thermometri vas posuimus tali forma e tenui lamella aerea fabricatum, ut anguste armaturis applicaretur (v. fig. K). Temperatura aliquo tempore praeterlapso aequa facta, thermometri in tubulum vitreum, cuius diamēter internus circa I millimetrum explebat, guttula spiritus vini est immissa. Gyro electrico, qui decem elementis galvanicis excitabatur clauso (tum temporis crūribus electromagnetis nondum quot nunc spirae filii cuprei erant circumvolutae), guttula II ad III millimetris, orificium tubuli versus, celeritate mox retardata est promotā et, gyro interrupto, quem locum ante tenuerat mox recuperavit. Tum primum aëris diamagnetismus, ut nullo dubio locus esset relictus, comprobatus erat simulque agendi ratio erat indicata, qua non solum per vestigare posses, utrum aliquod gazu[m] esset magneticum an diamagneticum, verum etiam quanta esset haec aut illa vis exactissime metiri valeres. Nihil scilicet opus est, quam ut pro aëre gazo perquirendo thermometrum impleas. Hic est locus multorum experimentorum maximi momenti adhuc instituendorum, atque haec est via ad gravissimas quaestiones hucusque pendentes disceptandas.

IV.

De ratione diversa qua magnetismus et diamagnetismus augeantur et diminuantur. Polaritas diamagnetica.

In experimentis quea paragrapho I. descriptimus faciendis mirum nobis est visum, quod particula cōticis arboris aut elythri melolonthae, cui plerumque oblongam dabamus formam, hoc die magnetica, postero diamagnetica adparuit. Quae res rara, postquam ad detegendam novam phaenomenorum magneticorum paragrapho VIII. descriptorum classem nos conduxit, ut discuteretur poscebat. Mox nobis elixit, causam, cur corpora nunc quasi magnetica, nunc quasi diamagnetica

inter polos dirigerentur, eam esse, quod non aequa semper distantia a polis absent, atque illud evenire in omnibus corporibus, quae substantias continerent et magneticas et diamagneticas ita inter se mixtas, ut haud multum abesset, quin illarum magnetismus harum diamagnetismo esset aequus. Quod quidem cylindriope demonstravimus e bismutho diamagnetic et stanno, ferro contento, magneticō compositi, qui cylindrus non aliter ac substantiae modo dictae se habuit.

Ad exponendas res supra relatas hypothesis posuimus, repulsionem magnete exercitam rapidius cum distantia decrescere quam adtractionem. Parvuli cylindri e varii generis ligni carbone confecti optime cognosci potuere, polis adpropinquatis, aequatorialem in situm dirigi, polis contra magis remotis aut quum ipsi cylindri filo bombyceo librae Coulombii involuto in altius evecti essent, distincte situm petivere axialem. Paulo post autem, reapse variam distantiam phaenomeni causam non esse, sed potius, e gyri intensitate pendentem, magnetis energiam perspeximus. Etenim eundem illum cylindrum e carbone esectum, polo rum distantia eadem manente, si I—II elementis galvanicis uteris, axialiter dirigi observabis et si III plusve elementa adhibebis, aequatorialiter ponи videbis. Unde hancce legem universe valentem deduximus:

Ipsius materiae diamagnetismus, magnetis vi decrescente, neque minus, quod inde sequitur, polis magis remotis, celerius debilitatur quam magnetismus. *)

Quae quidem lex hisce tenetur et confirmatur experimentis. Quodsi horologii vitro tantum hydrargyri infuderis, ut vitri magnetismus mercurii vincat diamagnetismum, atque si, uti vitrum, magnetismo nondum excitato, brachio staterae adligatum armaturas invicem adpropinquatas vix tangens, cum altera lance teneat aequilibrium, efficeris, post gyrum magneti circummissum, illud adtrahi videbis. Tum alteri lanci si pondera sensim inieceris, donec adtractionem superant, vitrum ab armaturis deripitur, paucis vero millimetris distans retinetur et tum demum omnino evehitur, quum gyrus sit interruptus. Qui agendi modus omne prosternit dubium; facile autem te fallet, nisi cavebis, quum librae momentum rotationis magnetismi effectui accedat.

Postea idem experimentum hac via, repetivimus. Statera ita instituta, ut

*) Ann. Pogg. LXXII, p. 343. „Ueber das Verhältniss zwischen Magnetismus und Diamagnetismus.“ 25. Juli, 1847:

Ibid. LXXIII, p. 613. „Ueber ein einfaches Mittel den Diamagnetismus schwingender Körper zu verstärken. Diamagnetische Polarität.“ 21. Februar, 1848.

in altius posset tolli, eodem in vitro bismuthum posuimus et, aequilibrio reparato, post magnetismum excitatum, nunc maxime distincte vidimus adtractionem, nunc repulsionem, quoad libra evenheretur aut demitteretur, aut quoad gyrus minori aut maiori elementorum numero efflueret. Ita, quod maxime mirum est phaenomenon, corpus e magneticis et diamagneticis substantiis constans, gravitatis vi subductum, certa quadam distantia, a magnete remoto pendente de polis disiunctum libere in aëre suspensus tenetur et hunc aequilibrii situm propulsus oscillationibus repetit.

In experimentis novissime commemoratis iusta distantia vitrum cum bismutho principio adtrahitur, mox repellitur; quae quidem res legem generalem confirmat, quum, ut bene scis, electromagnes, quam totam potest, energiam non temporis momento impetrat.

Inter armaturas longius invicem remotas cylindrus longior oscillans, eidem obediens legi, situm petit obliquum, quippe qui aequatorialis polis longius remotus, axialis vero sit proprior. Itaque obliqui situs aequilibrium (quod primum haud raro hisce in experimentis mentem nostram turbavit) corpus indicat ex elementis partim magneticis, partim diamagneticis mixtum.

Comprobata est denique lex illa eo quod globi e bismutho tornati, solutioni sulfatis ferrici immersi diamagnetismus, huius salis magnetismo IV. elementis elicto magis augebatur quam VIII., cuius quidem rei causa haec putanda est, quod solutioni et diamagnetica aqua et magneticus sulfas ferricus inerat, illiusque diamagnetismus rapidius accrescebat quam huius magnetismus.

Jam vero satis nobis protulisse videatur ad confirmandam legem supra expositam et explicatam, quae est maximi momenti in disciplina magnetismum tractante. Etenim si magnetismus et diamagnetismus nihil essent nisi diversarum distantiarum functiones de magnetis energia neutiquam dependentes, non eidem vi primariae adscribere possemus. Sed quae nunc rerum est ratio, supponi licet, utrumque eodem de fonte ducere originem, eandem sequi legem qua intensitas cum distantia est coniuncta, atque, ut ita dicamus, vi diamagnetiae maiorem resistantiam, maius obstaculum obiici quam magneticae.

Quae sentiendi ratio eo etiam veri est similior, quod cl. Reich eodem adparatu, quo telluris densitatem mensus est, polaritatem existere diamagnetiam demonstravit; idem cl. Poggendorff postea et simpliciori quidem modo est consequutus. Nosmet ipsi hucusque eandem rem non nisi via indirecta reperimus, quippe qui bacillum ferreum in situ aequatoriali inter armaturas lamellis cupreis vestitas poneremus et vim, qua acus bismuthea inter

polos super illum oscillans dirigeretur; sextuplicem esse factam observarimus. *)

Itaque quemadmodum magnetis polus in fine propiori bacilli ferrei ponit excitat amicum, idem contrario modo in fine propiori bacilli bismuthi inimicum provocat, aut, quod eodem tendit, gyri, quos Ampère in ferro magnetis polo excitatos supposuit, directione fluunt opposita ei, quam in bismutho persequuntur.

V.

De magnetismi et diamagnetismi variorum corporum metiendi methodo.

Postquam patuit, cuncta corpora et solida et liquida magnete aut adtrahi aut repelliri, expetenda mihi visa est methodus, qua attractionis et repulsionis quantitates substantiarum variarum inter se comparare et metiri valeremus, ut quemadmodum de pondere specifico aut calore cuiusdam corporis ita et de magnetismo et diamagnetismo specifico loqui licet, et sic nova in res physicas notio introduceretur. Qualem methodum invenimus hisce cogitationibus theoricis, experimentis si opus erat confirmatis, conducti. Intensitas vis, qua magnes substantiam adtrahit aut repellit in uno eodemque volumine aequaliter distributam (e. gr. in horologii vitro lamella vitrea polita obtecto) atque uno semper eodemque modo ad magnetis polos sitam, proportionalis est huius substantiae massae ideoque etiam ponderi. Unde magnetismum aut diamagnetismum substantiarum variarum, quarum in uno eodemque volumine distributarum, attractiones aut repulsiones uno in magnete definiuntur, eandem habere rationem sequitur ac fractiones, quarum nominatores intensitates attractionis aut repulsionis, denominatores autem pondera repraesentant. **)

*) Vide comm. novissime citatam.

**) Postea cl. Delesse quatuor Academie francogallicae obtulit dissertationes de intensitate magnetismi variorum corporum (Comptes rendus XXVII, XXVIII), in quibus hoc aliud principium posuit. „Si l'on présente l'extrémité inférieure d'un barreau aimanté à des substances réduites en poudre d'égale grosseur les poids de ces substances, qui resteront adhérentes... représenteront ce qu'on peut appeler le pouvoir magnétique de ces substances (XLVIII p. 35).“ Quod minus nobis videtur exactum.

Magnetismum ferri = 100000 ponere solemus; tum, ut dicta exemplis illustremus, lapidis magnetici = 40227 atque ferri oxydati, quod *Eisenglanz* vocatur, = 533 sumendum est.

Neque minus denique intensitatem ipsarum atomorum magnetismi definire possumus, massarum videlicet in locum atomorum numerum substituentes. Ferrei atomi magnetismum = 100000 ponentibus nobis, observationes pro lapide magneticō numerum 166656, atque pro ferro oxydato 1522 dedere. *)

Restat, ut de singulis rebus mentionem faciamus in magnetismo specifico determinando considerandis. Quam subtilissimi pulveris ferrei partem unam adiecimus XXV partibus adipis suilli et in massam commiscuimus aequalē, quā horologii vitrum cautiissime complevimus. E totius massae inclusae pondere calculare poteramus, quantum ferri vitro contineretur (designetur haec quantitas littera P). Vitrum impletum quo modo iam supra explicavimus staterae brachio suspensum est ita, ut in aequilibrio esset utque medias partes armaturarum semicirculares unico puncō tangeret. Horologii vitro armaturis magnetica vi imbutis attracto, alteri lanci levē vasculum (papyraceū e. gr.) imposuimus eique arcto ex orificio pulverem subtilem infudimus, donec vitrum armaturas relinqueret. Pondus vasculi una cum pulvere (M) adtractionem metiebatur definiendā, ideoque númerus M : P magnetismum substantiae, quae erat magnetis adhibiti intensitas, repräsentabat. Paulo post et quam celerrime fieri poterat neque amplius quā magnetis intensitas una eademque manebat **), easdem repetivimus ponderationes, postquam in adipis locum substantias examinandas substituimus, liquidas quidem directe vitro infusas, solidas in quam subtilissimum pulverem contritas aut integras, si minus magneticae erant, aut, si plus, certis rationibus cum adipe commistas. Qui agendi modus pro unaquaque substantia quotum m : p praestat, praecedenti M : P correspondentem, e quibus prodit quotus novus $\frac{m}{p} : \frac{M}{P}$ de intensitate magnetis non pendens. Loco novissime citato números magnetismi specifici variorum corporum in tabulam composuimus.

*) Ann. Pogg. LXXIV. „Ueber Intensitätsbestimmung der magnetischen und diamagnetischen Kräfte.“ 1. Juli, 1848.

**) Quod ut cognosceremus sequuti sumus methodum novam a cl. vom Kolke expositum in dissertatione „de nova magnetismi intensitatem metiendi methodo.“ Bonnæ, MDCCXLVIII.

Ad intensitates diamagnetismi variarum substantiarum, aut liquidarum aut in pulverem pistarum, inter se comparandas, vitrum illis impletum, magnetismo iam provocato, in aequilibrium redigere soliti sumus. Gyro interrupto, pondus quo opus erat ad detrahendum vitrum, integrâ gravitatis vi. polis adpressum, modo supra relato determinavimus; quod pondus quantitatem metiebatur diamagneticæ repulsionis. Quum apud haecce corpora, tum apud non ita magnetica ipsius. vitri attractio aut repulsio haud negligenda est.

Etiam variorum corporum diamagnetismi specifici numeros tabulæ inseruimus, quam etiam magis extendissemus, nisi de substantiarum puritate dubitassemus. Aliquot exempla uti proferamus, invenimus esse diamagnetismum

aquæ	100
phosphoris	100
acidi sulfocarbonici	102
acidi muriatici	102
aetheris sulfurici	127
olei terebynthini	123
florum sulfuris	71
natri muriatici	79
acidi nitrici	48
bismuthi nitrici basici	35
acidi sulfurici	34
hydriargyri	23

Num illorum numerorum rationes simplices margine adnotatae casu, an certa e causa prodierint, integrum relinquimus.

Ponderationibus postea instituendis discernere nobis propositum est, num, quod quidem statuimus, magnetismus et diamagnetismus specificus pro qualibet magnetis intensitate idem maneat, ita ut, si corporum pure magneticorum alterum post alterum in vitro possum e. gr. dupli vi adtrahatur, haec ratio, gyro maiori aut minori vi adhibito, minime mutetur. Attamen, quomodo cunque res se habet, quae paragrapho praecedente retulimus, perspicuum faciunt relationem diamagnetismi et magnetismi duorum corporum, e. gr. bismuthi et ferri, de magnetis intensitate pendere, unde illos ipsos alterum alterius functiones esse, tibi elucebit, neque minus clare intelliges, has ipsas functiones graphicæ repraesentari et hoc modo in formam redigi posse mathematicam.

Principium, quo considerationes nobis factae nituntur, modificere oportet, si substantiarum magnetismus valde est magnus et si illae ipsae integrae (non contritae aut dilutae) examini subiiciuntur. En exemplum; in vitro deinceps posita sunt primum ferri massa ita formata ut vitri cavitatem accurate, ubique tangeret, tum scobes ferreae, denique mixtura supra iam dicta ferrei pulveris et adipis, et pro singulis casibus unius grammatis ferri adtractionem aequam, reperimus grammatibus respective

27,00 30,32 33,28.

Tota igitur adtractio magnetismo specifico correspondens (33,28) eo est debitata, quod ipsum vitrum una cum corpore contento magnetem constituebat, cuius polus borealis supra australem magnetis, australis supra borealem erat positus. Atque vice versa adtractio tota augebitur, si vitrum unico solum polo imposueris. Neque te fuget, hocce modo magnetismum specificum lucem adferre cognitioni nostrae de magnetum statu interiori.

Etiam quum substantia liquida polis sit imposta, cuius magnetismi distributionem cognoscere cupis, libra uti tibi licet; corpus liquido immersum illa est suspendendum.

VII.

De nexu qui est inter calorem et magnetismum aut diamagnetismum.

Usque ad novissimum tempus, calor magnetismum omnino delere creditus est; at cl. Faraday, etiam ferrum candescens, quamquam minus, magneticum esse, docuit, veri autem simile censuit, nihilominus calore crescente magnetismum abire in diamagnetismum. Hae erant res, quum susciperemus, non solum problemata illa solvere, sed etiam, praecedente paragraphe descriptis methodis adhibendis, quantus esset magnetismus et diamagnetismus variarum substantiarum variis in temperaturis, definire et metiri. Post experimenta primo minus perfecte composita, hanc denique viam sequiti sumis.

Patellae porcellanicae, horologii vitri loco librae applicatae, substantiam examinandam imposuimus, aut per se liquidam aut in pulverem contritam, atque medium in eam globulum introduximus thermometri, cuius scala usque ad 350 gradus centesimales indicabat. Patella in aequilibrium redacta, flamma admota, quam maxime licebat, calefaciebatur atque, gyro clauso manente,

substantia gradatim frigescente quam frequentissimas ponderationes fecimus, ut aut adtractionem magneticam aut repulsionem diamagneticam definiremus; simul unaquaque in ponderatione temperaturam observavimus. Corpora nimis magnetica, aut lamellaria facta et medio foramine ad immittendum thermometri globulum instructa, aut in pulverem contrita et duobus micae foliolis inclusa, media in arena patellam implente collocavimus.

Huiuscemodi pro nicelo lineam curvam invenimus, qui typus omnium corporum magneticorum nobis videtur. Quae linea, cuius abscissae temperaturis correspondent et ordinatae magnetismi specifici quantitates repraesentant, inde a 0° magis magisque abscissarum axi accedens, ad 300. gradum, ubi lapsus maxime proclivis, puncto inflectionis praedita est, indeque axem nullibi secans, ut asymptotam, comitatur. In suspenso relinquimus, utrum curvae pars superior retrorsum prolongata asymptotam habeat, an sit natura parabolica. Etiam ferro et ferro oxydato correspondentes dedimus curvas, quarum puncta inflectionis in temperaturas superiores incideré videntur; insuper eandem curvam pro mangano oxydato-oxydulato ($MnO + Mn_2O_3$) delineatam communicavimus.

Quod ad corpora spectat diamagnetica, pro bismutho curvam reperimus, quae ad 250. gradum i. e. ad eam temperaturam, qua illud metallum liquefieri incipit, puncto instructa est inflectionis, unde subito ad axem abscissarum descendit eumque sequitur. (Bismuthum circum thermometri globulum, primo liquescens, inter ponderationes factum est solidum. Thermometri globulo circumdata erat capsella e cupro confecta, quae illum tueretur et cui quaedam hydrargyri guttae erant infusae).

Fortasse putas, diamagnetismum eo rapidius decrescere, quod status partium minimarum aggregationis fiat alter; altamen sulfuris repulsio diamagnetica, quae erat 0,240 grammatis, non mutabatur parte 0,005. grammatis inter temperaturam ordinariam et quae erat longe superior quam, qua liquefieri solet. Hydrargyrum purum inter 0. et 300. gradum nullam ostendit variationem. Quis scit, annon nihilo secius hisce substantiis curvae corrispondent, nonnisi altissima temperatura aut infima a linea recta diversae? *)

*) Ann. Pogg. V. LXXV. „Ueber das Gesetz, nach welchem der Diamagnetismus und Magnetismus von der Temperatur abhängig ist.“ 25. Juli, 1848.

VII.

De relatione quae est inter magnetismum et diamagnetismum corporum atque corundem compositionem chemicam.

Doctrina magnetismi specifici, cuius fundamenta in paragrapho V. iecimus, novam praebet methodum cognoscendi, utrum corpus e pluribus constans elementis compositio sit chemica, an nihil nisi agglomeratio mechanica. Quod quidem si evenit, corporis magnetismus apparet, qualis et quantus e summa magnetismi intensitatibus singulorum elementorum prodit, in qua formanda ne diamagnetismum ut magnetismum negativum calculo introducere negligas. Longe aliud vero res se habet, si compositionem respicias vere chemicam, in qua minime in universum licet concludere de statu partium magnetismi in eundem totius corporis.

Plurimas observationes magni momenti e ponderationibus a nobis factis deduximus, quae illis rebus lucem admovent, quarumque nonnullas sequentibus tecum communicabimus.

Ferrum eo facto, quod ipsi oxygenium ad oxydum formandum accessit, magnetismum ad fractiunculam usque omisit. De ferri oxydulati magnetismo hucusque nihil certi constat. Magne lapis compositio est chemica ferri oxydati et oxydulati ($\text{FeO} + \text{Fe}_2\text{O}_3$). Namque si eiusdem magnetismi quantitatem deducere velles e ferri oxydulati, huic magnetismum adscriberes, necesse esset, longe eum, qui ipsi est ferro, superantem. Omnia ferri oxyda, quae natura procreantur et in officinis chemicis fabricantur, ferrum continent oxydulatum, maximeque veri est simile, agglomerationes esse puri oxydi et compositionis e ferro oxydato et oxydulato constantis. Quae videndi ratio si est vera et recta (nemque quidquam, quominus experimento examinetur, impedit) sola ponderatione elementorum pondera tam secure et tam accurate definiire poteris, quam chemica analysis non valet. Quodsi corpori insunt x partes pro centum ferri oxydati et y ferri oxydati cum oxydulati, ad inveniendas quantitates x et y hasce formulas dedimus:

$$x + y = 100$$

$$1,34 \cdot x + 402,97 \cdot y = M,$$

in quibus M corporis examinandi magnetismum specificum, ponderatione definitum, significat. Si y = 0, invenies $M = 134$, qui est oxydi magne-

tismus, dummodo haematites (*Rotheisenstein*) a nobis perquisitus, qui inter ferri oxyda minimum dedit magnetismum, nihil sit nisi purum ferrum oxydatum. Determinationes modo dictae, variis conditionibus a nobis factae, primo 134, tum 133, 5 praebuere.

Eaedem illae formulae, si pars una pro centum lapidis magneticci, id est $\frac{1}{3}$ ferri oxydulati, compositioni inest, $M = 535$ dant, quem eundem numerum magnetismi specifici invenimus illius haematitis speciei, cui nomen est *Eisen-glanz*. Aegre tantum chemica analysis illud revelare possit; nostra methodo contra non solum $\frac{1}{3}\%$, verum etiam $\frac{1}{100}\%$ ferri oxydulati, imo maxime se-cure, invenire valemus.

Si ad formandum sal oxydo acidum accedit, oxydi magnetismus, etiamsi acidum est diamagneticum, non debilitatur. Salis magnetismus augetur, si aqua dissolvitur. Sulfatis ferrici solidi magnetismus ad dissoluti est ut 78:126. Saliūm ferricorum dissolutorum magnetismi quantitatum, quoad acidum nitricum aut sulfuricum aut muriaticum continent, rationes sunt 287:332:516, dum eorundem acidorum diamagnetismi sunt ut 48:34:102. Ferri sulfurici oxydati magnetismus ad oxydulati est ut numeri 133 et 249. Contra vero in saliūbus haloidibus a nobis examinatis maximum habet magnetismum, cuius basis est oxydum. Si nicelus oxydulatus, ad formandum hydratum, aquam adsumit, magnetismus auctus est ratione 1:4; quam rem miram vario modo comprobavimus.

Sesquiferrocyanas kaliecius (ruber) magneticus est, ferrocyanas (fulvius) vero diamagneticus, etsi circa 12% ferri continet; quae quum ita sint, quod sanguis diamagneticus est, non mirabere. *)

VIII.

De nova magnetismi actione, quae ad relationem eius et iuminis pertinet.

Iam ad novam nos convertamus phaenomenorum seriem longe dignissimo-rum, quae memorentur; exponamus illa, alterum alteri, quo ordine detecta sunt, adserentes. Rara illa res, quod fragmenta corporum organis instructorum nunc quasi magnetica, nunc uti diamagnetica dirigerentur, antequam expositionem

*) Vide comment. §. V. citatam.

paragrapho IV. datam reperimus, nos commovit ad pervestigandum, num directio fibrarum corporum organicorum alicuius esset momenti; tum analogiam sequentes problema nobis proposuimus, num in crystallis structura, partium minimarum iuxtapositio, de qua axium opticorum situm dependere haud ignoras, esset spectanda. Primam lamellam c^t turmalino esectam, qualis ad lumen polarisandum adhiberi solet, cuiusque lateri longiori axis opticus erat parallelus, fausta fortuna elegimus. Lamellam ob ferrum contentum maxime esse magneticam, ex eo patebat, quod polo de longiori adtraheretur. Inter armaturas, conicis acuminibus instructas, filo bombyceo suspensa est triplici modo; primo scilicet ut longius, tum ut minus latus esset verticale, denique ut horizontaliter oscillandi ei daretur potestas. Primo modo suspensa ut corpus directa est magneticum, duobus alteris contra modis, quae res mira te non fugiet, ut diamagneticum, hoc est, ut directio longior situm pateret et obtineret aequatorialem. Unde rem non aliter hisce duobus in casibus se habuisse intelliges, ac si turmalini axis opticus repelleretur; quod primo casu eam ob causam fieri non potuit, quod ille rotationis axi parallelus erat, ideoque circa hunc omnia symmetrice erant disposita; atque, quod minimum negligendum est, illa repulsio ob lamellae formam tum demum apparere potuit, quum vim magneticam, quae lamellam contrarium in situm compellere tendebat, superare valisset. Substituimus inde illi lamellae alia turmalini prismata, variis locis collecta, et pellucida et opaca; omnia, limpidis et non coloratis exceptis, magnetica erant ideoque, inter polos suspensa, directa sunt, ut prismatum axes, quorum erat dimensio longe maxima, cum linea conciderent polos coniungente. Polis autem altero ab altero remotis, aut, quod eodem, crystallis filo curtato in altum evectis, continuo 90 gradibus detorta atque materiae magnetismo superato ut corpora diamagnetica directa sunt, donec axes optici in lineam axialem essent perpendicularares. Crystalli limpidi hunc eundem locum semper tenuere. Quum turmalini, si calefiunt, electricam ostendant polaritatem, crederes fortasse, hanc aliquanti illis in phaenomenis fuisse momenti. Quod ut dirimeremus, fecimus, ut crystallus in aqua oscillaret; quumque hoc in casu eodem modo sese haberet ac supra indicavimus, illam conjecturam non esse veram concludas necesse est.

Unde igitur nobis persuasum est, phaenomena a nobis observata omnino esse nova; qua re commoti complures alios crystallos perquisivimus et primum quidem spathum calcarium, ut crystallum, cuius massa esset diamagnetic, haberemus. Lamellam adhibuimus, cuius superficies axi optico erant perpendicularares, quaeque, lumine polarisato adhibitō, notissimas illas curvas isochroma-

ticas ostendebat. Lamellae axis ob massae diamagnetisimum, polis propinquis, situm petivit axialem, polis vero remotis aequatorialem, quasi magnetica esset facta. Rhomboëdrum spathi calcarii, quale natura produxit, nunquam non ita directum est, ut axis opticus, forma optime indicatus, planum peteret lineae polos coniungenti perpendicularē, cui nomen deditimus aequatoriali. Attamen si axis fortuito perpendicularis erat, corpus directum est ut diamagneticum. Eadem ac illi duocristalli phenomena exhibent beryllus, dioptasus, vesuvianus, qui omnes sunt magnetici et, quod omittere nolis, una cum turmalino et spatho calcario negativam ostendunt refractionem duplicem. Unde hasce deducimus leges:

Crystallus disdiaclasticus uniaxis et negativus, inter magnetis polos suspensus, dirigitur, quasi axis opticus utroque eorum repelleretur. Vis, quae illud efficit, si polos removes, tardius debilitatur, quamqua massa aut attrahitur aut repellitur.

Hinc coniiciendum erat, etiam crystallos biaxes proprio modo magnete affici; perquirendum autem erat, utrum ipsi axes, an sola linea media, id est eorum angulum acutum bipartiens, illa vi sollicitarentur. Quod ut in planum proverheremus, foliolum micae horizontale suspendimus, ita igitur, ut lineae mediae directio cum fili bombycei concideret. Folium ita directum est, ut amborum axium planum aequatoriale fieret, id est quasi uterque axis repelleretur. Quam rem eo comprobavimus, ut, lumine polarisato adhibito, annulorum systemata viderentur. At mica negativus est crystallus; atque ut mica plurimi alii crystalli, quorum refractioni dupli eadem est natura, se habuere, unde concludimus: Axes crystallorum biaxium et negativorum polis aequa vi repelluntur.

Situ observato, quem quarzius et topazius inter polos interdum minus distincte et incerte ob corpora aliena illis adhaerentia (nihil opus est ad magnetismum in quarzio provocandum, quam ut lima collinas aut chalybe percutias) incauti illas leges omnes in crystallos extendimus, et positivos et negativos. Quae invenissemus prima commentatione communicavimus.*).

Huiuscmodi res se habuere, quum cl. Faraday alia phænomena illis non ita aliena deterget et duabus commentationibus societati regiae britannicae oblatis descriptis. Ingeniosus ille vir compluribus in crystallis lineam piano prin-

*.) Ann. Pogg. LXXII. „Ueber die Abstossung der optischen Axen der Krystalle durch die Pole des Magneten.“ 25. Juli, 1847.

cipalis fissilitatis perpendicularem (magnecrystallicam ab illo nominatam) polis magnetis non solum non repellit verum attrahi reperit; tum adtractionem illam quemadmodum nos in repulsione axium opticorum invenimus; dirigere solum neque centrum gravitatis demovere; denique vim dirigentem esse nullam, si axis magnecrystallicus esset verticalis. Quae quum auctor nobiscum communicasset, qui fieri potuisse, quin nobis in mentem veniret axes opticos esse, qui in illis corporibus non repellerentur sed adtraherentur? Quod quidem illico publicavimus^{*)}. Primo phaenomena tam similia erant a nobis observatis, tum omnibus in crystallis uniaxibus axis magnecrystallicus cum crystallographicò principali concidit; accedit, quod tot corporum ad systema tesserale pertinentium nullus, etsi fissilis, illud demonstrat. Nostrae autem sentiendi rationi obviam erant cum quarzio et topazio a nobis facta experimenta atque, quod nihil apparuit, si directio magnecrystallica esset perpendicularis. In corporum numero, quae phaenomenon, de quo agitur, maxime distinete exhibent, cl. Faraday memorat bismuthum, stibium, arsenium, sulfates nicelicum et ferricum. Metallorum illorum crystalli rhomboedrorum habent formam ideoque ut unaxia censeri queunt. Quibus in examinandis bismuthum et arsenium a cl. Faraday detectum phaenomenon valde clare monstrare reperimus. Prisma e bismutho crystallisato esectum, cuius axis longitudinalis illius plano fissilitatis erat perpendicularis, vehementer contra massae diamagnetismum axialiter directum est, quasi magneticum esset corpus. Arsenium magneticum erat; eiusdem metalli lamella tenuis, cuius superficies simul fissilitatis parallelae erant, aequatorialem situm petebat, ut substantia diamagnetica. Stibium autem a nobis perquisitum phaenomenon ostendit omnino contrarium a cl. Faraday descripto. Subtilis antimoni lamella eodem ac arsenii modo confecta, quamquam diamagnetica, ut substantia dirigebatur magnetica: fissilitatis scilicet planum axiale est factum. Quid igitur impedivit, quominus stibium ut exemplum legi a nobis prolatae subsumendum vindicaremur, quidque fuit, quod non contrariam in partem axes opticos bismuthi et arsenii et in universum omnium positiorum crystallorum adrahi poneremus? Quam rem etiam sulfatis nicelici rationes comprobare videntur, sed huius substantiae crystallos idoneos adipisci nequivimus. Sola experimenta de sulfate ferrico facta nostrae sententiae contradixerunt. Hisce de

^{*)} Ann. Pogg. LXXVI. „Ueber die neue Wirkung des Magneten auf einige Krystalle, die eine vorherrschende Spaltungs-Fläche besitzen. Einfluss des Magnetismus auf Krystallbildung.“ 27. März, 1849.

phaenomenis aliquantulo temporis iis, quae paragrapho XI. descripsimus, detraceti sumus, donec, ut systematicum agendi ordinem sequeremur, ad ea redivimus.

Hucusque imprimitur elegeramus e numero crystallorum biaxium, quorum formae crystallinae prismata sunt rhombica recta. Axes opticos continens planum duobus trium axium crystallographicorum (prismatis axis longitudinalis et diagonalium baseos) definiti, et lineam medium cum uno aut altero illorum congruere, haud ignoras. Qualis crystallus, ita suspensus, ut unus crystallographicorum axium sit verticalis, nova magnetismi actione semper dirigitur, ut reliquorum axium alter aquatorialem, alter axiale petat situm. Neque tamen haec rerum est ratio in prisma rhombico obliquo, cuius axi linea media plerumque neque perpendicularis neque parallelis est. Jam theoriae considerationes nobis persuasere fore, ut, si talis prismatis horizontalis suspensi utrumque axem poli aequa repellat, linea media semper in planum aequatorialem se converteret. Quare conducti hancce proposuimus formulam:

$$\tan \varphi = \cos \psi \tan \lambda,$$

in qua λ angulum repreäsentat constantem prismatis axe et linea media inclusum, φ angulum eodem illo et linea aequatoriali horizontalique formatum, ψ angulum, quo crystallus circum axem suum est tortus, quem angulum ψ ita numerabis, ut ab altero crystalli situ ex eas, quo linea media est horizontalis, atque inde ad 360° progrediare. Formula docet necesse esse, crystallus, si eandem in directionem circum axem suum torqueri perget, iterum atque iterum novum capiat situm; certa quadam positione, angulo $\psi = 90^\circ$ correspondente, crystallum aequatorialem dirigi eumque, quaecunque fuerit positio primaria, angulo 180° tortum, alterutra linea aequatorialis parte cum illa angulos includere aequales, valorem denique maximum anguli φ aequalem esse λ .

Primum crystallum cyanitis elegimus, sed, quod exspectaveramus, non evenit, immo res se habuit quasi situi axiali aequatorialem substituisse, id est quasi linea media adtraheretur, non repelleretur: at cyanites est crystallus positivus. Cyanitem sequutus est augites. Diopsidum autem, qui natura est negativa, cuique forma erat, quae axium opticorum situm luminis polarisati ope cognosci permetteret, formulae legi obedivit. Quis igitur in dubium vocare potuit, lineam, quoad crystallus esset positivus aut negativus, polis respective adtrahi aut repellere? Nihilosecius contradictiones restabant solvendae, prosternendae, imprimitur in quarzio obviam factae. Qua re commoti non lamellam amplius adhibuimus quarzii crystallo esectam, quam situm aequatorialem relieturam et axiale captu-

ram antea exspectaveramus, verum prisma originariis faciebus limitatum, quod, ob diamagnetismum suum, primo aequatorialiter dirigebatur, filo vero involuto, nunc vidimus re vera in situm abire axiale. Quod uti tibi eveniat, ne prismatis longitudinem duplarem facias latitudinis, caveas. Item alios perquisivimus crystallos, inter quos imprimis scapolithus (ad Pargasum reperta) et troostites phaenomena illa maxime distincte ostendebant, ante omnes vero oxydum stanni (*Zinnstein*). Itaque quam legem primo protulimus, angustior est, eique substituenda est haec.

Uterque magnetis polus axem opticum crystalli cuiusdam uniaxis aut adtrahit aut repellit, quo ad est aut positivus aut negativus.

Examinavimus inde accuratius crystallos positivos biaxes, prima quidem topazii prismata horizontalia, quae etiamsi diamagnetica, polis remotis axiale petebant situm. Quibus in crystallis linea media cum axe prismatis concidebat. Lamella gypsi in monte Montmartre inventi, horizontalis suspensa, ita directa est, ut quum postea perquisita esset, linea axialis cum linea media concidisse pateret. Ambo haec experimenta lineam medium adtrahi demonstrant. Quod si lamella modo dicta ita suspensa est, ut linea media sit perpendicularis, planum axes opticos continens axiale petit situm. Simili modo si illa topazii prismata verticalia suspenderis, ita dirigentur, ut planum axium, quod diagonalem minor rem continet, fiat axiale; quod idem aliis in crystallis evenit positivis.

Sed iam locus nobis esse videtur de sulfate ferrico, summa cura nobis examinato, loquendi. Primum nobis in mentem venit perquirere, annon phaenomena a cl. Faraday descripta et ab eo in lineam planis fissilitatis perpendicularem relata, potius ad lineam medium reducenda essent, quae quidem cum illo angulum circa 15° format. Quare commoti crystallo pulcherrimo esecuimus fragmentum planis fissilitatis limitatum. Planum axium opticorum iam antea luminis polarisati ope definiveramus, sicut et lineam, qua hoc planum sibi perpendicularare fissilitatis secat. Si crystallus quomodo vis suspensus erat, hoc tantum observato, ut illae superficies verticales oscillarent, semper actio apparuit maxime distincta; linea vero lamellae superficiebus perpendicularis tum modo accurate axalis dirigebatur, quum linea notata esset verticalis, ideoque linea media circa axem oscillaret verticalem. Sin autem illa linea erat horizontalis, perpendicularum, in planum fissilitatis demissum, declinatum erat circa 15° unam aut alteram partem versus. Atque omnino res se habuit, ut formula supra relata praescribit, angulo λ valore 15° adscripto et angulo φ a situ axiali numerato.

Experimentis modo descriptis hanc deduximus legem universalem:

In crystallis biaxibus linea media aut adtrahitur aut repellitur, quam actionem in universum explicare poteris, si utrumque axem opticum aequa vi in cristallis positivis adtrahi, in negativis repelli pones.

Quae propositio discutienda subtilissima nobis videtur fere omnium in rebus physicis obviam factarum, atque multum adhuc abest, ut omnes difficultates victae, complanatae sint.

Potesne enim vim tibi singere quae, e polis magnetis emanans, longius turmalini prisma ita dirigat, ut fines prismatis eosdem polos fugant, qui massam eorum adtrahant. Quam rem paradoxam neque cl. Faraday nec nosmet ipsi, quamcunque pervestigandi viam sequuti, explicare valuimus. Novissime modo e magno sulfatis ferrici cristallo cubum esecuimus, cuius acies 11^{mm} longae erant cuiusque superficierum par unum piano fissilitatis parallelum, altera eidem erant perpendicularia. Quaecunque autem superficies armaturis, invicem adpropinquatis, imponebantur, nihil omnino discriminis reperimus inter variarum attractionum quantitates; haecce fere erant 5,4 garammatum.

Neque re vera esse, cur crystalli biaxes negativi opponantur positivis, optime scis; indicat enim illa distributio nil nisi, quod minimus aetheris elasticitatis axis, qua de re Fresnel mire et pellucide disseruit, quoad crystallus sit positivus aut negativus, acutos aut obtusos axibus opticis inclusos angulos bipartitur. Crystallus igitur, in quo axes optici alter alteri sunt perpendicularares, qualis est sulfas ferricus, neque positivus nec negativus ullo iure dici potest; in limitibus potius stat inter positivos et negativos; in eo lineae, quae angulos axium opticorum bipartuntur, geometricè distingui nequeunt. Sed etiam nunc altera maximae altera minimae correspondet elasticitati. Evenit hoc si, axibus maxima, mediae, minima aetheris elasticitatis litteris c, b, a designatis

$$2b^2 = a^2 + c^2.$$

Tali crystallo ita suspenso, ut axes horizontales oscillarent, duo tantum observati sunt situs oppositi aequa stabilis aequilibrii, attamen necessarie quattuor existissent, si ex attractione aut repulsione axium opticorum illas positiones deducere velles. Sulfas igitur ferricus et unicus quidem est inter omnes nobis examinatos crystallos, qui legi novissime prolatae non obedit.

Reiecta aliquamdiu hypothesi a nobis de actione magnetis in axes opticos posita (namque si invenire velis, ne anxius interpretationem iam a te inventa explicantem retineas, vide) nobis problema proposimus annon, pro illa hypo-

thesi, phaenomena explicari possent e sola aetheris in crystallis distributione à Fresnel exposita. Etenim illa linea media in crystallis positivis, in quibus adtrahitur, minimae, atque in negativis, in quibus repellitur, maximae elasticitatis est axis. Corpus fingamus inter polos ita suspensum, ut circum gravitatis centrum ei libere rotandi data sit facultas, atque circum idem centrum notam illam ellipsoïdicam superficiem descriptam, cuius radii vectores elasticitatum quadratis sunt aequi. Nonne, fortasse quaeris, tale corpus ita dirigitur, ut minimus ellipsoïdis axis cum linea concidat polos coniungente? Nonne, si circum verticalem tantum axem torqueri potest, eum situm petit, quo elasticitatis minoris directiones ante ceteras polis adversae sunt? Quae si ita essent, omnia, quiae supra retulimus phaenomena in crystallis exhibita, et positivis et negativis, ita suspensi, ut circum lineam rotare possint, axium opticorum piano perpendiculari, explicarentur, neque exciperentur in sulfate ferrico observata. Poni porro posset, directiones, quibus elasticitas sit, certam quantitatem superans, repelli, quibusque minor sit elasticitas, adtrahi. Attamen ferrum sulfuricum ita suspensum, ut linea media minimae elasticitatis sit verticalis, nullo omnino modo dirigi saepius et accuratissime observavimus; attamen eum, secundum formulam modo datam directum iri, exspectes, necesse, quum alteri elasticitatis axes sint inaequales. Alii crystalli omnino hypothesi contrario modo se habuere. Itaque haec hypothesis est relinquenda.

Quo modo enim phaenomena explicare vis? Non displiceret nobis ponere, in aethere gyros Ampèreicos inductione, una aut altera directione, circum axes facilius et validiores nasci, aut quod idem, crystallum inductione magneticum factum, polos secundum axium opticorum directionem adipisci: nisi haec nova videndi ratio etiam attractionem aut repulsionem massae posceret, solo axium situ mutatam. Quae actio diversa non observatur. Neve tamen sperare desinamus fore, ut veram hörum phaenomenorum expositionem aliquando inveniamus, atque plures adhuc crystallos examinemus, maniorique cum cura eos perquiramus, qui validius illa actione afficiantur.

Clarissimus Faraday splendidis a se inventis de piano polarisationis magnete rotato viam munivit ad novas res detegendas; namque illo facto iam constat, aetherem magnete affici et quod sane mirum videtur in iis solis corporibus afficitur, quae singulari modo nec luminis naturam mutant nec magnete exercentur. Quod spectantes ad subtilem provocamur disquisitionem, qua discernamus, an non quarzius, qui secundum axis directionem lumini mirum illum polarisationis dat statum, proprio et singulari modo etiam magnete afficiatur.

IX.

**De magnetismo adplicando in cognoscendis fossilibus,
eorumque structura crystallina et natura optica.**

Notissimum est, quomodo phaenomena fossilibus in lumine polarisato exhibita coniuncta sint cum eorum structura, atque hanc etiam, quum forma externa perierit, illis indicari. Idem magnetismi ope adipisci potes et restrictione quidem omissa, quod fossilia pellucida esse debent. Et hoc quidem auxilio determinationes structurae facillime fiunt. Quae quum ita sint, introducendum est novum elementum in res mineralogicas. Quod respicientes, ad omnia corpora fossilia denuo examinanda provocamur, neque minus, si paragrapho sequente relata spectamus. Namque absurdum id corpus tantum magneticum dici, intelliges, qui magnete fertur.

Quodsi corpus inter polos, quomodo vis suspensum, non ita semper dirigitur, ut magnetica poscit attractio aut diamagnetica repulsio, id est, ut eius dimensio longior aut axialis fiat aut aequatorialis, secure concludere licet, revera neque amorphum esse, nec ad systema pertinere tesserale. Si corpori est axis crystallographicus principalis, qui idem est solus opticu, etiam si deformis tantum fragmenti tibi est potestas, illum axem duobus suspensionibus factis definire vales: simili modo, quo corporis centrum gravitatis determinas. Negativo videlicet in corpore intersectionem nota, illius et planorum aequatorialium, quae duabus quibuslibet suspensionibus inveneris; linea, qua illa intersectantur, axis est opticu. Quod quidem facillime efficere poteris in spatho calcario et turmalino. Eidem methodo locus est in crystallis positivis, quorum idoneum exemplum memoramus oxydum stanni; solummodo piano aequatoriali axiale est substituendum.

Si prisma horizontale suspensum circum axem tortum diversa dirigitur energia, quod ex oscillationum numero cognoscere licet, quas, e situ depulsum aequilibrii, facit (Sesquiferrocyanas kalicus), aut, si nunc axialis nunc aequatorialis dirigitur (staurolithus), crystallus neque tetragonali nec hexagonalis est ad numerandus systemati. Si prisma circum axem tortum diverse, etiam oblique, tenetur, aut est clinorhomhicum aut clinorhomboicum.

Si alicuius biaxii crystalli fragmentum bis quomodo vis suspendebis, exemplo, ut antea axem unicum, nunc accipies lineam medium; et si, ut haec linea sit verticalis, suspendebis, neque ignorabis, utrum crystallus sit positivus an negativus, ambo rum axium planum invenies, quod nunc axiale fit, nunc aequoriale; ideoque, si insuper angulos axibus inclusos noveris, ipsos habebis axes. Ad cognoscendum, autem utrum crystallus sit positivus an negativus, nihil opus est nisi, ut quomodo vis suspensum circum lineam torqueas horizontalem; namque prout haec linea, si eandem torquendi directio nem conservas, per situm it axiale aut aequoriale, ille aut positiva aut negativa est natura; atque accedit, quod anguli valor maximus respectivo axiali aut aequatoriali linea et ea, circum quam torqueas crystallum, formati, eius est anguli, quem modo dicta linea et axium media complectuntur *).

Coniicere te putamus, quomodo crystalli geminati, etiam quum alterum penetreret, se habituri sint. Diopsidi crystalli oppido afficiuntur eamque ob causam maxime idonei sunt hisce experimentis instituendis. Etiam stauro lithus opaca et geminata apta apparebit.

Breviorem gypsi crystallum, aqua contenta caloris vi demta, structura privavimus crystallina, atque, dum antea ob axes directos magneticus prodibat, nunc ob massam solam exercitam ut diamagneticus observatus est. Examinavimus denique pinitis crystallum, quem vario modo dissecuimus neque tamen unquam axes opticos indicari invenimus; qua causa moti, ni temere nobis videtur, crystallum destructum putaremus et id quidem eo magis, quod micae crystalli, quibus eadem ac illi sunt elementa, tanta vi magnete diriguntur.

Oxydum stanni quod, ut crystallus, tam clare illa phaenomena ostendit, nulla, ut pseudomorphus, exhibuit. Neque omnino in crystallis pseudomorphis quidquam tale licet exspectare.

Vitrum subito refrigeratum, quod exspectaveramus, propriam suam structuram magnetice directum prodidit **).

Néque omnino dubitamus fore, ut axium opticorum transpositionem in gypso, caloris vi effectam, magnes clarissime indicet.

* Hic locus est ut agnoscamus, quantopere hisce in disquisitionibus nos adiuverit, cl. Beer, vir peritissimus in rebus quae ad optican crystallographicam pertinent. Conf. ipsius dissertationem „de situ axium opticorum in crystallis biaxibus.“ Bonnae, MDCCCLXXXVIII.

**) Poggend. Ann. LXXV. „Ueber das Verhalten des abgekühlten Glases zwischen den Magneten.“ 10. Juli, 1848.

X.

**De polaritate permanente crystallis certas in directio-
nes exhibita. De magnetismo terrestri crystallis direc-
tis indicato. De reactione crystallorum in magnetem.**

Quum caeruleum cyanitis crystallum inter magnetis polos examinaremus, etiam gyro interrupto situm antea occupatum obstinate eum obtinere, observavimus, immo tum etiam, quum longe de polis esset evectus; unde etiam tellurem eum directuram esse coniecumus. Optime quae exspectaveramus comprobata et confirmata sunt, quum eundem crystallum bombycis filo adligatum hamuli ope suspendissemus. Est igitur crystallus vera acus magnetica; atque, quod accedit, cui praescribere potes, quod horizontis punctum indicet; efficere exempli gratia potes, ut polum borealem geographicum spectet, ita ut dices, declinationem esse nullam: nihil est opus, nisi ut crystallum in hamulo circum axem longitudinalis quanto oportet rotet. Quum polo boreali acus crystallinae, quomodo vis horizontaliter suspensae, cylindri magnetici (100^{mm} longe, 9^{mm} crassi) satis validi, qui terrae superet magnetismum, polum australem ita admoveremus, ut cylindrus semper esset horizontalis, sequuta est illa, ut angulus longiori crystalli et cylindri axibus inclusus, ei esset aequus, quem ille axis crystalli cum linea meridiana magnetica formaverat.

Cyanitis crystallus eo etiam cum acu magnetica congruebat, quod ostendebat polaritatem, habebatque unum tantum aequilibrii situm. Quod novum nobis videtur momentum, cuius in diiudicanda natura novae magneticae actionis ratio sit habenda.

Utrum cyanitis crystallo proprietates illae iam de initio insuissent an validum demum magnete essent datae, discernere non poteramus. Cui admotus ille polaritatem quidem exhibuit sed, inter polorum acumina, invicem adpropinquata, revertit. Alteram vero polaritatem, quam cuius axis cum linea congruit media axium opticorum crystallo impertiri nequis. Alii cyanitis crystalli, quos examinavimus, magnetismo terrestri debiliter modo directi sunt, antequam magneti erant admoti, et polares adparuere. Quorum energia electromagnete est aueta. Nonne, quaerimus, iam de origine eos terra magnetica vi imbuit? Polaritasne eorum formae crystallinae rationibus definitur?

Etiam verticalis suspensum cyanitis crystallum terra direxit.

Eodem modo quo cyanites etiam angites se habuit.

Longe fortius quam crystalli enumerati oxydum stanni Zinnwaldense directum est, qui crystallus est uniaxis et positivus, cuiusque suspensi axem magnetismi terrestris ope secure determinare valebis. Qualis crystalli fragmentum, ea forma praeditum, ut dimensio longior axi optico sit perpendicularis, acum constituit magneticam, cuius fines puncta indicant occidentale et orientale, vel potius acus, qua vulgo utimur, directioni perpendiculari. Crystallus ob ferrum contentum magneticus erat; forsitan fieri possit, ut invenias, cuius massa magnetem non sequatur, neque eo minus magnetismo terrestri dirigatur. Illud oxydum stanni inter polos polaritatem non revertit, nec multo dirigendi vi auctum visum est, postquam magneti est admotum *).

Simulac inveneramus magnete axes tanta vi dirigi, de reactione dubitare non poteramus. Frustra vero eam ex oscillationibus cognoscere suscepimus, quas parvulae magneticae acus supra bismuthum, spathum calcarium, turmalinum cetera suspensa faciebant; nullum observari poterat discrimen, si fragmenta illorum corporum ita posueramus, ut axium opticorum situs esset mutatis. At quum talem acum (fragmentum acus, qua sui solet) supra oxydi stanni crystalli planum, quod axem continebat, suspendissemus, actio, qua ille acum exercebat, maior erat quam qua tellus: acus crystalli axem sequebatur.

Phaenomena igitur praecedente paragrapho descripta ipsis, quos enumera-
vimus, inhaerent crystallis, neque omnino nova quadam inductione elicita adpa-
rent, illaque intermissa, disparent **).

XI.

De magnétis actione in crystallis formandis.

Relatione detecta, quae est inter magnetismum et corporum structuram, ne momento quidem temporis dubitavimus fore, ut eadem illa vis in crystallos

*) Alter huius fossilis crystallus (Schlackenwaldense), quem nuperime perquisivimus, phae-
nomena illa non ostendebat.

**) Nihil hucusque nosmet ipsi publicavimus de iis, quae in hoc paragrapho, nec in paragra-
phis praecedentibus, de diversa actione in crystallos positivos et negativos indicavimus.
Citandum autem est: On the Magnetic Relations of the Positive and Negative Optic Axes
of Crystals. By Prof. Plücker of Bonn in a letter to, and communicated by, Dr. Faraday.
20th. of Mai 1849. (Philosophical Magazine, June p. 450.)

ageret formandos. Etenim quae vis totum crystallum dirigit; apperta est quae etiam moleculas ita exercet, ut dum illae ad formandum crystallum iuxtaponantur, eum situm, si polos spectas, occupent, qui crystallo respondent iam formato et libere suspenso. Ad quam rem confirmandam longe ante effeceramus, ut salia e solutionibus polis impositis crystallisarent; sed, quae erant conditiones nihil memorabile nobis evenit. Inde quum cl. Faraday docuissest, bismuthum nova illa actione tanta vi inter polos dirigi, ad quas antea perceperamus ideas reversis, melius nobis res cessere. Bismuthum inter fortis magnetis polos refrigescens talem adipiscitur structuram, ut planum fissilitatis principalis perpendiculariter fiat in lineam polos coniungentem. Quod ut apertum facheremus, fragmentum carbonis, cui fodinam infoderamus oblongam et rectangularem, deinceps ita inter polos collocavimus, ut longius latus primum esset axiale, tum aequatoriale, denique exacte notatum teneret situm obliquum. Liquefactum inde bismuthum et altiori quam qua liquefit temperatura calefactum illi fodinae insudimus; illud lente refrigeruit atque solidi facti planum fissilitatis situm tenuit supra notatum. Quod idem ex eo etiam patuit, quod bismuthum inter polos suspensum semper eam habuit aequilibrii positionem, qua erat solidum factum. Opera sane est pretium etiam plura talia experimenta instituere.^{*)}

Nonne fortasse magnetismus terrestris aliquanti erat momenti in formandis terrae visceribus inclusis crystallorum molibus? Namque quo illa vis minori est intensitate, eo lentius illi crystalli refrigerare et solidi sunt facti.

Scripsimus Bonnæ ineunte mense Julio a. MDCCXLIX.

Tabulae expositio.

A. Electromagnetis suppositorium e robore fabricatum tribusque pedibus fulatum; crassus est 10 centimetra ac diametrum habet 60 centimetrorum. Insertus ei est magnetis nucleus ferreus cylindricus formamque ferri equini referens, cuius quidem arcus in tabula non appetet, brachiorum vero mensae A perpendicularium fines (polos) litera C designavimus. Utrique brachiorum, inde a suppositorio 46 $\frac{1}{2}$ centimetra, altorum, 102 millimetra cras-

^{*)} Vide comm. supra citatam.

sorum axibusque 284 millimetris inter se distantium, circumvolutae sunt octo fili cuprei, 4,36 millimetra crassi, struturæ unaquaque e 90 spiris consistentes (B). (Primo utrumque brachium tantum straturis erat instructum. Atque, quæ res est sane memorabilis, tum armaturæ polis impositæ iam e longe maiori distantia altera alteram adtrahebant collidebantque quam nunc, quum spirarum numero adacto utraque a suo polo fortiori vi retineantur.) Quartæ struturæ ex uno eodemque filo sunt formatae, atque 4 filorum fines hinc illinc in singulas partes aereas columellarum (D), ligneis interpositis disiunctas, inserti cochlearum vi restringuntur. Partes aereæ filorum opè vario modo ad quem finem consequendum placet coniungi possunt, quæ autem infimæ sunt cum vasibus sunt adiunctæ hydrargyro impletis, quod in liquidum gyrotropi (E) brachia immerguntur. Cuius quidem instrumenti constructione describenda supersedere non dubitamus, quum in vulgatissimo libro „Pouillet - Müller“ sit exposita et figuris illustrata.

F. Mensa quum alteros ad fines, tum ad ferendam Coulombii libram (G) destinata.

H. Armatura conis (a) instructa, quorum in locum partes acutiores et semicircularæ (b) cochlearum ope inseri possunt.

I. Armatura major canale longitudinali (c) excavata, ut adhiberi possit in repetendis experimentis a cl. Faraday de rotatione polarisationis plani factus. Huius armaturæ parti semicirculari alterum laterum vasis aërothermometri figura K delineati exactissime potest applicari.

Figuris H, I et K mensuram adiecimus quibus centimetris correspondentem.

Praeter armaturas H et I adhibitæ sunt in experimentis hac commentatione memoratis quibus parallelepipedi erat forma, quaeque longae erant 189, latae $67\frac{1}{2}$, altae 27 millimetra; tum coni, quorum altitudo 25 millimetra explebat, bases polorum superficiebus erant aequæ; inde cylindri, 48 millimetra alti et quo diametro nucleus magnetis instructi, qui cylindri media altitudine canalibus horizontalibus perforati erant, quibusque cylindri tenuiores, 2 centimetra crassi et 13 centimetra longi et altero fine acuminati immitterentur; denique parallelepipedum rectangulare, cuius baseos quadratae latus $6\frac{3}{4}$, longitudo $36\frac{1}{2}$ centimetra explebat, perforatum erat medio canale longitudinali.

Reliquum est ut ad id progrediar, quod scribendi nobis occasionem dedit. Indicimus ea solennia, quibus sacra memoria regis augustissimi divi Friderici Guilelmi III. interprete **FRIDERICO RITSCHL**, professore eloquentiae publico ordinario, pie riteque recolatur. Finita solenni oratione iudicia quinque ordinum de litterarum certaminibus anno praeterito initis enunciabuntur et novae quaestiones proponentur. Huic igitur solennitati ut interesse velint, mandato Rectoris Magnifici Illustrisque Senatus, huius Universitatis **PROFESSORES AMPLISSIMOS, CLARISSIMOS DOCTORES, COMMILITONES ORNATISSIMOS UNA CUM PROCERIBUS ET MAGISTRATIBUS HUIUS CIVITATIS GRAVISSIMIS ET QUOTQUOT NOBIS LITTERISQUE FAVENT OMNIBUS** qua decet observantia invitamus.

